



B r o j : 02-05-116/19

D a t u m, 29.01.2019. godine

ZAPISNIK

sa 23. redovne sjednice 6. saziva Općinskog vijeća Doboj Istok

Dvadesetreća redovna sjednica 6. saziva Općinskog vijeća održana je dana 26.01.2019. godine u zgradi općine Doboj Istok, u Klokotnici, sa početkom u 10,20 sati.

PRISUTNI: 16 vijećnika, Omer Hadžić, sekretar općine, Sulejman Delić, pomoćnik općinskog načelnika za civilnu zaštitu, Alirizah Mujkić, pomoćnik općinskog načelnika za poduzetništvo i finansije, Enes Bećirović, pomoćnik općinskog načelnika prostornog uređenja i Admir Šišić, ovlašteno lice da zamjenjuje pomoćnika općinskog načelnika za društvene djelatnosti, branilačko – invalidsku zaštitu i opću upravu, te predstavnik RTV TK.

ODSUTNI: Hasan Bekrić, vijećnik LDS.

Sjednicu je otvorio i vodio predsjedavajući Općinskog vijeća, dr. Ferid Konjić.

Dr. Ferid Konjić, predsjedavajući Općinskog vijeća: „ Ja se izvinjavam što smo morali prolongirati početak sjednice. Na samom početku sjednice molim tehničkog sekretara da provjeri prisutnost vijećnika. Na početku 23. redovne sjednice selamim i pozdravljam pomoćnike općinskog načelnika, kolegice i kolege vijećnike i predstavnike medije. Općinski načelnik je najavio izostanak sa ove sjednice.“

VIJEĆNIČKA PITANJA I INICIJATIVE

Dr. Ferid Konjić, predsjedavajući Općinskog vijeća: „ Ukoliko ima pripremljenih vijećničkih pitanja i inicijativa dajem mogućnost da se iznesu. Ne vidim prijavljenih.“

USVAJANJE ZAPISNIKA SA PRETHODNE SJEDNICE

Dr. Ferid Konjić, predsjedavajući Općinskog vijeća: „ Dobili ste zapisnik sa prethodne sjednice i ukoliko ima primjedbi na zapisnik dajem priliku da se iznesu. Ne vidim prijavljenih. Ko je za zapisnik?“

Glasanje: ZA – 16, PROTIV – 0, UZDRŽANIH – 0.

USVAJANJE DNEVNOG REDA

Dr. Ferid Konjić, predsjedavajući Općinskog vijeća: „ Dobili ste prijedlog dnevnog reda koji je utvrdio Kolegij za ovu sjednicu i dobili smo prijedlog za proširenje dnevnog reda, a to je tačka Razmatranje Prijedloga Akcionog plana za djecu općine Doboj Istok za period 2019-2021. godina. Razlog zašto je naknadno je vremensko ograničenje za prihvatanje ove inicijative. Ima li ko potrebu nešto da kaže? Nema. Ko je za da se ova tačka uvrsti na dnevni red?“

Glasanje: ZA – 16, PROTIV – 0, UZDRŽANIH – 0.

Sada imamo kompletiran dnevni red koji se sastoji od 5 tačaka. Ko je za ovaj dnevni red?

Glasanje: ZA – 16, PROTIV – 0, UZDRŽANIH – 0.

Usvojen je sljedeći:

DNEVNI RED

1. Razmatranje i usvajanje prijedloga Odluke o dodjeli općinskih priznanja,
2. Razmatranje i usvajanje prijedloga Odluke o utvrđivanju javnog interesa za rekonstrukciju raskrsnice sa semaforizacijom u Klokotnici – II faza,
3. Razmatranje i usvajanje Izvještaja o realizaciji Programa rada Općinskog vijeća Doboj Istok za 2018. godinu,
4. Razmatranje i usvajanje Program aktivnosti povodom obilježavanja Dana nezavisnosti BiH i Dana općine Doboj Istok,
5. Razmatranje prijedloga Akcionog plana za djecu općine Doboj Istok za period 2019-2021. godina.

REALIZACIJA DNEVNOG REDA

Ad. 1. Razmatranje i usvajanje prijedloga Odluke o dodjeli općinskih priznanja.

Dr. Ferid Konjić, predsjedavajući Općinskog vijeća: „ Materijal te dobili sa propratnim aktima, odnosno stavovima Komisije i predlagačima. Tačku dajem na diskusiju.“

Selmin Karić, vijećnik SDA: „ Uvaženi predsjedavajući, zamjenice, sekretaru Vijeća, saradnici općinskog načelnika, kolege i kolegice vijećnici, predstavnici medija selam alejkum i dobar dan. Komisija za odlikovanja i općinska priznanja je 04.12.2018. godine održala svoj 4. sastanak na kojem je donijela odluku o raspisivanju Javnog poziva za dostavljanje mišljenja i inicijativa za dodjelu društvenih priznanja općine Doboj Istok. Javni poziv je otvoren 10.12.2018. godine i trajao je do 26.12.2018. godine. Nakon toga je Komisija je 10.01.2019. godine održala 5. sastanak na kome je razmatrala pristigle prijedloge. Ukupno je pristiglo 11 prijedloga i Komisija je ustanovila da svi prijedlozi formalno pravno ispunjavaju uslove iz javnog poziva. Od tih 11 prijedloga 5 je bilo za Pismenu zahvalnicu općine, 3 prijedloga su bila za Zlatnu značku i 3 prijedloga za Plaketu općine. Prijedlozi za Pismenu zahvalnicu općine Doboj Istok su:

1. Jusufović (Ibrahima) Hasib iz Brijesnice Velike za doprinos u odbrani zemlje,
2. Kurtić (Redže) Ibrahim iz Brijesnice Male za doprinos u odbrani zemlje,
3. Buljić (Fehima) Nisvet iz Brijesnice Velike za doprinos u razvoju privrede,
4. UG NK "Mladost - Brijesnica"- za doprinos u razvoju sporta,
5. Mjesna zajednica Brijesnica Velika – za doprinos u društvenom, kulturnom i sportskom razvoju.

Obzirom da je Mjesna zajednica Brijesnica Velika 2007. godine dobila Zlatnu značku Općine Komisija je mišljenja da ne bi bilo pravilno da sada bude predložena za niže priznanje obzirom da se priznanja ne dodjeljuju samo za doprinos u jednoj godini nego za cjelokupan doprinos u razvoju određenih oblasti. Tako da je za Pismenu zahvalnicu predložila sljedeće kandidate:

1. Jusufović (Ibrahima) Hasib iz Brijesnice Velike za doprinos u odbrani zemlje,
2. Kurtić (Redže) Ibrahim iz Brijesnice Male za doprinos u odbrani zemlje,
3. Buljić (Fehima) Nisvet iz Brijesnice Velike za doprinos u razvoju privrede,
4. UG NK "Mladost - Brijesnica" za doprinos u razvoju sporta.

Za dodjelu Zlatne značke općine dostavljeni sljedeći prijedlozi:

1. Poručnik Dževdetbegović (Fadila) Damir iz Brijesnice Male za doprinos u odbrani zemlje,
2. Hrnjičić (Rešida) Mirsad iz Brijesnice Velike za doprinos u razvoju privrede,
3. Hadžić (Bećira) Osman iz Brijesnice Velike za doprinos u kulturnom razvoju.

Komisija je prihvatila sva 3 prijedloga, tako da su prijedlozi ovako kako sam pročitao:

1. za doprinos u odbrani zemlje poručnik Dževdetbegović (Fadila) Damir iz Brijesnice Male,
2. za doprinos u razvoju privrede Hrnjičić (Rešida) Mirsad iz Brijesnice Velike,
3. za doprinos u kulturnom razvoju Hadžić (Bećira) Osman iz Brijesnice Velike .

Kada je u pitanju Plaketa imali smo 3 prijedloga:

1. Kapetan Batalević (Mujo) Senad iz Klokotnice za doprinos u odbrani zemlje,
2. Škrebo (Begana) Ibrahim iz Brijesnice Male za doprinos u razvoju privrede,
3. Hadžić (Muhameda) Fadil iz Brijesnice Velike za doprinos u razvoju privrede.

Obzirom da se članovi Komisije nisu mogli usaglasiti oko prijedloga za Plaketu općine i da je bilo prijedloga da se Plaketa dodjeljuje samo po osnovu doprinosa u razvoju privrede ili da predložimo dvije Plakete, međutim to je u suprotnosti sa našom Odlukom o ustanovljenju i dodjeljivanju općinskih priznanja. Moje mišljenje je bilo obzirom da je prijedlog Koordinacije boračkih udruženja izuzetno dobar, a naravno i ova dva ostala prijedloga su dobri i bilo koji od njih da je predložen sigurno to zaslužuje. Međutim u posljednjih 10 – tak godina samo je jedna Plaketa dodijeljena po osnovu doprinosa u odbrani i to Seadu Arnautoviću. Moje mišljenje je bilo da treba malo više uvažavati ovu populaciju kada je u pitanju doprinos u odbrani. Po mom mišljenju sve su oblasti podjednako bitne, međutim da nije bilo ovih ljudi mi danas vjerovatno ne bi ni bili u prilici da donosimo ovu odluku. S obzirom da se nismo mogli usaglasiti oko ovog prijedloga, ja sam dao na glasanje sva tri prijedloga i najviše glasova je dobio prijedlog Koordinacije boračkih udruženja kapetan Batalević (Muje) Senad iz Klokotnice. Komisija je takođe predložila da se na svečanoj sjednici prilikom dodjele općinskih priznanja pročitaju biografije dobitnika općinskih priznanja, odnosno da se dobitnici ukratko predstave u dvije tri rečenice, ali to je stvar protokola. Ja se nadam da će biti prostora da se u program povodom obilježavanja Dana općine i Dana brigade uvrsti i ovaj naš prijedlog.“

Dr. Ferid Konjić, predsjedavajući Općinskog vijeća: „Ima li još diskutanata? Ne vidim prijavljenih diskutanata i dajem na izjašnjanje. Ko je za ovu Odluku?“

Glasanje: ZA – 12, PROTIV – 0, UZDRŽANIH – 4.

Ad.2. Razmatranje i usvajanje prijedloga Odluke o utvrđivanju javnog interesa za rekonstrukciju raskrsnice sa semaforizacijom u Klokotnici – II faza.

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju. Ne vidim prijavljenih diskutanata i dajem na izjašnjanje. Ko je za?“

Glasanje: ZA – 16, PROTIV – 0, UZDRŽANIH – 0.

Ad.3. Razmatranje i usvajanje Izvještaja o realizaciji Programa rada Općinskog vijeća Doboj Istok za 2018. godinu.

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju. Ne vidim prijavljenih diskutanata i dajem na izjašnjanje. Ko je za ovaj Izvještaj?“

Glasanje: ZA – 9, PROTIV – 0, UZDRŽANIH – 7.

Ad.4. Razmatranje i usvajanje Program aktivnosti povodom obilježavanja Dana nezavisnosti BiH i Dana općine Doboj Istok.

Dr. Ferid Konjić, predsjedavajući Općinskog vijeća: „Materijal ste dobili, dajem tačku na diskusiju.“

Hasan Hasančević, predsjednik kluba vijećnika SDA: „Ja ću sve da poselamim i pozdravim. Javio sam se zato što smo na klubu imali određenih prijedloga i sugestija. Sačekat ćemo formiranje komisije od strane općinskog načelnika kako bi se školske priredbe uvrstile u ovo, pa da priredba bude u Brijesnici Velikoj umjesto u Klokočnici s tim da u Klokočnici, pošto je sajam kupujemo domaće 21.03. ušao u ovu manifestaciju, probamo izrotirati neke stvari ako bude organizator to sve prihvatio.“

Dr. Ferid Konjić, predsjedavajući Općinskog vijeća: „Ima li još diskutacija? Ne vidim prijavljenih i dajem na izjašnjenje. Ko je za ovaj Program?“

Glasanje: ZA – 10, PROTIV – 0, UZDRŽANIH – 6.

Ad.5. Razmatranje i usvajanje prijedloga Akcionog plana za djecu općine Doboj Istok za period 2019-2021. godina.

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju.“

Senada Džanić, predsjednica kluba vijećnika SBB – LDS: „Predsjedavajući, zamjenice, kolegice i kolege vijećnici, pomoćnici općinskog načelnika, sekretaru Općinskog vijeća, predstavnici medija selamim vas i pozdravljam. Pošto sam i sama bila dio Grupe za dobrobit djece osjećam potrebu i obavezu da nešto kažem o istom. Inicijativa za donošenje lokalnih akcionih planova potiče od 1992. godine od međunarodne konferencije u Dakaru u Senegal. Na Konvenciji Ujedinjenih nacija 1996. godine prvi puta je predstavljen koncept gradova djece - prijatelja djece. Akcioni plan za Bosnu i Hercegovinu usvojen je od Vijeća Bosne i Hercegovine. Akcioni plan za djecu općine Doboj Istok za period 2019 -2021. godina je strateški dokument koji sagledava sveobuhvatne potrebe djece na lokalnom nivou, definiše aktivnosti koje je neophodno realizovati kako bi se zadovoljile prioritetne potrebe djece, te identifikuje raspoložive i nedostajuće kapacitete za ostvarivanje i poštovanje osnovnih prava djeteta u ovoj lokalnoj zajednici zasnovanih na osnovnim principima UN Konvencije o pravima djeteta. Naravno da ovako važan strateški dokumenat ima svoje potrebe i svrhu, a potreba za izradu akcionog plana za djecu potiče iz obaveze i odnosa vlasti prema populaciji djece mlađe od 18 godina starosti koja žive na prostoru općine Doboj Istok. Svrha Akcionog plana za djecu u općini Doboj Istok je da stvori pozitivne postojanje i klimu za pravilan rast i razvoj svakog djeteta u kojoj će se potrebe djece tretirati kao prioritetna pitanja i zadovoljavati se u njihovom najboljem interesu, na način da će djeca učestvovati u odlukama koje utiču na njihov život, preuzimati uloge i djelovati kao odgovorni građani. Nadalje, Akcioni plan za djecu će omogućiti i praćenje efekata uloženog novca koji se izdvaja za ovu populaciju, te dobijanja relevantnih i objektivnih povratnih informacija o kvalitetu pruženih usluga, odnosno njegovoj stvarnoj dobrobiti za djecu. Akcioni plan za djecu pripremljen je od strane Grupe za dobrobit djece općine Doboj Istok uz učešće i drugih aktera u zajednici čiji je rad neposredno vezan za pitanja zaštite i dobrobiti djece. U procesu su aktivno participirale Općina Doboj Istok, Centar za socijalni rad, Dom zdravlja, Policijska stanica, osnovne i srednja škola, Dječije obdanište, MFS Emaus, Sportski savez općine, Udruženje mladih MB „LIVE“, Udruženje građana „ART Leptir“, a sve to je pod pokroviteljstvom nevladine organizacije World Vision BiH. Predstavnici navedenih institucija okupili su se u decembru 2017. godine i formirali Lokalnu grupu za dobrobit djece i započeli sa radom definisanjem osnovnih potreba djece na kojima bi trebalo raditi. Kroz pripremljene upitnike svako je za svoj sektor definisao svoje percepcije, interese i

saznanja o određenim pitanjima iz svog sektora, te se započelo sa pripremanjem za izradu Lokalnog akcionog plana za djecu, dokumenta koji bi vodio računa o ovoj kategoriji našeg društva. Organizovane su i fokus grupe sa djecom u kojima su ona dala svoja mišljenja i stavove o problemima sa kojima se susreću, oblikujući ih u posebno kreirane preporuke koje je lokalna Grupa za dobrobit djece uvažila definisanjem konkretnih mjera. Druga faza podrazumijevala je određene strateške determinante za izradu Akcionog plana, a finalna faza se sastoji od upoznavanja šire društvene zajednice sa usvojenim strateškim okvirom i željenim rezultatima. Strateško budžetiranje će pokazati iznos potrebnih sredstava za realizaciju Lokalnog akcionog plana za djecu, a očekivati je da će stepen realizacije direktno zavisiti od raspoloživih sredstava u budžetu općine Doboj Istok, donatorskih izvora i individualnih projektnih aktivnosti. Prema navedenim pojedinačnim akcionim planovima, koje imate u materijalima, ovim Lokalnim akcionim planom za djecu predviđen je sumarni budžet od 361.800 KM. Napominjem još jednom da se budžet ovog plana ne naslanja samo na budžet općine Doboj Istok, jer bi bilo nerealno i očekivati ovoliki iznos za ovaj plan. Sredstva za realizaciju planiraju se iz različitih izvora donatorskih, nevladinih i drugih organizacija, projektnih aktivnosti prema višim nivoima vlasti i sl. Svakako nadamo da neće izostati podrška Općine Doboj Istok, jer i do sada je Općina Doboj Istok učestvovala u istom. Ovo ću potkrijepiti sa još dva primjera iz oblasti formalnog obrazovanja, iz kojeg između ostalog i ja dolazim, a to su: za aktivnost prilagođavanje infrastrukture u obrazovnim ustanovama za učenike sa poteškoćama u razvoju u kojoj se planira osposobljavanje najmanje dva objekta vertikalna i horizontalna, pristupačnost, toalet rampe i sl. U Lokalnom akcionom planu planirana je stavka od 15.000 KM. Mi u JU OŠ „Klokotnica“ već smo riješili taj problem i ja se zahvaljujem ovdje prisutnim koji su učestvovali sa donacijama za isti bez i jedne KM iz općinskog budžeta. Iako je u Lokalnom akcionom planu predviđeno da je finansijer za isto Općina Doboj Istok i nevladina organizacija. Drugi primjer je za aktivnost obezbjeđenja besplatnih udžbenika i školskog pribora, školske užine, prijevoza i stipendija, planirano je 90.000 KM. Nikako se ta sredstva ne očekuju samo iz budžeta Općine Doboj Istok, nego su nosioci finansiranja kantonalno Ministarstvo obrazovanja i nauke, Općina Doboj Istok i nevladine organizacije. Dakle ponovo napominjem da finansiranje Lokalnog akcionog plana planiramo iz više različitih izvora. Isto tako usvajanjem Lokalnog akcionog plana je od ključne važnosti da bi se moglo konkurisati na projekte nevladinih organizacija, nadležnih ministarstava, sredstava Evropskih fondova itd. Djeca su jedna od najosjetljivijih kategorija u društvu i njima je potrebna stalna podrška i pomoć odaslkih kako bi mogli da se pravilno razviju, da razviju svoje potencijale i time doprinesu napretku društva i zajednice u kojoj žive. Zato se nadam da ćemo uvažiti važnost ovog strateškog dokumenta za našu općinu i isti usvojiti.“

Dr. Ferid Konjić, predsjedavajući Općinskog vijeća: „Ima li još diskutanata? Ne vidim prijavljenih i dajem na izjašnjavanje. Ko je za ovaj prijedlog?“

Glasanje: ZA – 16, PROTIV – 0, UZDRŽANIH – 0.

Na ovaj način smo iscrpili današnji dnevni red. Hvala vam na učešću u radu ove sjednice ovog saziva Općinskog vijeća.“

Sjednica je završena u 10,40 sati.

ZAPISNIČAR
Behara Hadžić

SEKRETAR
Omer Hadžić

PREDSJEDAVAJUĆI
OPĆINSKOG VIJEĆA
dr. Ferid Konjić

Službena zabilješka:

Zapisnik je usvojen na 24. redovnoj sjednici Općinskog vijeća Doboja održanoj dana 23.02.2019. godine.

U Klokočnici, dana 26.02.2019. godine

*Zabilješku sačinio
Omer Hadžić, sekretar Općine*